



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma : Tir Yimiyim

tiryimiyim@aolima

tir yimiyim

TAPAK 8

**Ration ochimashi ken o nung ED-i  
TMC lenir Shankar Adhya puogo**

**Tajon Buchanan Inter Milan  
nung denogo**

VOL. XXI NO. 84 (ADOK 84)

DIMAPUR

AMUNGNÜ (SUNDAY)

ANJETI (JANUARY) 07, 2024

₹ 5.00

## Israeli osangbener tetsür kati prangpong bener senzür



**New Delhi, January 6, 2024**

**(Agencies):** Hamas-i ano amaksü ta amokmerenba mapang ka nung Israeli broadcaster Channel 14 nung osang azünger Lital Shemesh-i TV nung prangpong bener tangokba noksa ka kanga prokshir.

Iba noksa ya Mongulbarnü agiba liasü aser noksa nung Lital anchor desk nung mena lira ser la longpant tesülen prangpong ka bena aliba angur.

Israel nung security tebilemstütem aliba agi tetsür aikati handgums bener senzür.

Lital Shemesh-i tawa tu la indang social media nung prangpong kashishi ka nung la kashishitsü angazükba sayua liasü. Idangji lai nübertem dang prangpong abentsü ayongzük.

Lital-isa khatepba tesemtem

nungi osang abenba den sepai uniform semer tangokba noksatem lemsatepa arur.

Lai 2002 nungi 2005 tashi Israel Defense Forces (IDF) Border Police division nung full combat soldier ka ama inyaka liasü.

Iba mapang tebur 100 ka aliba unit ka nung la dena tetsür 5 dang liasü.

October 7, 2023 nü Hamas-i amakba sülen Israel-i Gaza Strip amaksü sentong renem dang Lital Shemesh-i tebilemstü abenba olen kar lemsatepa liasü.

"Kiralongraba anema raratsü, Hamas anema raratsü atema linük ajunga anioker. Israel kümer küm 75 arudang yamai nisung aika tepsetba mengudang. Iba ya onok asoshi holocaust tanabuba lir" ta lai shia liasü.

## Governor-i Manipur Press Colony atema lung azüngtsü

**Imphal, January 6, 2024**

**(Agencies):** Imphal nung Manipur Press Club (MPC) indang Media Resource Centre lapoktsüba sülen Governor Anusuiya Uikey-i working journalists den tebilembatem lemsatepa liasü.

MPC atongba sülen Governor Uikey-i Journalists' Memorial Pillar nung narjung ka yutsü aser Manipur Press Colony atema lung azüngtsü.

Honibarnü MPC 49 buba Foundation Day amongba nungtem nung Governor Uikey-i Rs. 1 lakh tenla agütsü.

"MPC-i loktiliba nung literacy aser media literacy kasa ajungketba atema pelar. Media ya democracy ka nung tongshi pezübuba ta züngshir aser iba jagi nübertem media akhümtsübur aser media tebilemstü khuret tuluba akümer" ta Uikey-i ashi.

Media nisungtemi shinga tsütsü meshii osang shitak sangdongtsüla aser yimjung, puteptsüba aser longjema alitsü atema tasü ita ochi jembitsüla,

ta laisa ashi.

Manipur nung mepetmesü adok dang media nisungtemi kanga dang shisa kaa osangtem belenshir ta Governor-isa ashi.

"Tensa majung dang journalist ka süngjema aser aremzüka alitsüla aser osang tejangja sangoktsütsüla. Loktiliba nung osang tejangja prokshiba nung media-i tongtipang shilem agir" ta Uikey-isa shisem.

Laisa media nisungtem dang linük sobaliba aser inyaksangshi wazüka ayutsü aser democracy ajungkettsü atema ayongzük.

Media-i tetsürtem aser tanurtem dak sendakba osangtem kanga dang kümdanga belenshitsu la ta Uikey-isa shisem.

Iba sentong nung All Manipur Working Journalists Union President Bijoy Kakchingtabam, Editor's Guild Manipur President Khogendra Khomdram, Information and Public Relations Director Dr Th. Charanjeet Singh, taoba MPC ketdangpurtem aser journalists aden.

## Delhi nung NE sobaliba sayua Uttar Purvi Mahotsav amongtsü

**Guwahati, January 6, 2023**

**(Agencies):** January 13 nungi 17 tashi New Delhi nung Northeast India indang sobaliba benjung Uttar Purvi Mahotsav amongtsü sentong lir.

Iba sentong ya Bharat Mandapam, Pragati Maidan nung amongtsü aser Ministry of Development of North Eastern Region, CPSE, North Eastern Handicrafts & Handlooms Development Corporation Limited (NEHDC) ajanga ayongzük.

Mezüngbuba Uttar Purvi Mahotsav ya Northeast India nung nisung temeyoktep aliba sayutsü atema jungjunga renema lir. Iba benjung nung traditional arts, crafts & cultures sayutsü.

Iba benjung nung Northeast nungi weavers, farmers aser entrepreneurs 250-i shilem agitsü.

Maneni, "Towards Prosperity: Catalysing North East's Progress Towards a Viksit

Bharat" ta ser panel discussion ka alitsü aser iba nung Northeast ajanga linük renloka aotsüba shilem lemsateptsü.

Ano, "Women Leaders in the Northeast" ta ser panel discussion nung tetsür lennirtemi shilem tulu agia aruba lemsateptsü.

"Northeast in Action" omen nung ajemdaker "Youth, Workforce, and the Economic Tapestry of India" panel discussion ajanga Northeast nung lanurtem aser mapa inyakterem indang jembitsü.

January 14, 2024 nikong dang 5:00 ako nungi Assam nungi Satriya Dance aser Tripura nungi Hojagiri Dance ia sayutsü. Iba sobaliba sentong sülen Fashion Show ka alitsü.

January 15 nü sobaliba sentong nung Manipur nungi Tangtha Fight aser Sikkim nungi Lion Dance ia sayutsü.

January 16 nü Mizoram nungi kentener telok kati shilem agia

benjungmong tenzüksü aser January 17 nü rock band Bottle Rockets India-i tongti shilem agiba den singer & violinist Sunita Bhuyan-ia shilem agitsü.

Iba benjungmong nung Meghalaya nungei Wangala Dance, Nagaland nungi Mungwanta, Mizoram nungi Bamboo Dance, Assam nungi Bihu Dance aser Tetseo Sisters o Shankuraj Konwar nungeria shilem agitsü.

Uttar Purvi Mahotsav mapang Jawaharlal Nehru University (JNU) nung Barak Hostel lapoktsü. Iba hostel nung JNU nung NER kaketshir 400 tashi alitsü akok.

Maneni, Dwarka nunga North East Convention Centre atema lung azüngtsü. Iba convention centre ya international standards ama yanglutsü aser Delhi nung North East India atema cultural and information hub ama asütsü.

## Union MoS Krishnan Pal Gurjar-i Niuland semdang

**Kohima, January 6, 2024**

**(Akashvani News):** Union Minister of State for Power and Heavy Industries Krishnan Pal Gurjar-i Honibarnü Niuland District semdangogo.

DC office, Niuland nung sentong ka nung jembidang Union MoS Gurjar-i Showuba-Pangsha National Highway tekaraba nung yangluzüktsü nangzük aser Niuland District

nung wellness centre ka yanglutsü shimtetba osang metetdaksü.

"Vikshit Bharat Sankalp Yatra ya teküpoktiba jenjang nung alirtem dang sorkari tenzüksü scheme balala osang tejangja metetdaksütsü atema lir. Prime Minister-i teküpoktiba jenjang nung alirtem tashi ait nung dang linük ka yangertetsü ta amanger" ta paisa ashi.

MoS Gurjar-i lokti lennirtem aser NGOs den ajurutepa sensaksem aser iba sülen Hovishe yimtsüng semdanga liasü.

Gurjar-i anogo ananü atema Nagaland semdangi arua lir aser pai nübertem dang nungi sorkar mapatongtem indang osang tajung angashiba atema pelaba metetdaksü.

Tanü Public Health Engineering Minister Jacob Zhimomi-i pa meina senzüa liasü.

## Kaketshirtemi Naga lokti atema senti rongsen akümtsüla: Zhaleo Rio



**Dimapur, January 6, 2023**

**(TYO):** Urban Development & Municipal Affairs Advisor Zhaleo Rio, IAS (Retd.)-i Niuland Area Students' Union indang 28 buba biennial conference tembangba sentong nung aden.

"Kaketshirtem aser lanurtemi asen sobaliba aser western/modern sobaliba tsüngda alir saka asenoki asen sobaliba aser maitsü metoktsütsüla" ta Zhaleo Rio-i ashi.

"Kaketshirtem ya tarutsü lennirtem lir aser nenoki loktiliba yangerba nung shilem agitsü. Kaketshirtemi shisaliok nung bendanga agütsütsüla aser pei jangraba azüngba den mapa angutsüba courses agitsüla.

agütsütsü inyakyim tenzüka aliba kaketshirtemi meteta alitsüla" ta paisa shisem.

"Maneni lennirtemi kaketshirtem asoshi career guidance ayonga agitsüla aser higher education nung parnok len anitsüla. Talisa kaketshirtemi bendanga agütsütsüla, Tsüngrem tsübuttsüla aser alizüng atongtsü atema asentzü sena merangtsü ayongzük" ta Advisor Zhaleo-isa ashi.

Niuland district ya nüngdakba agi aser administrative convenience atema akümba lir. Chief Minister Neiphiu Rio-i jaloktsüba 'Land of diversity' nung terenlok mapa aika inyakttsü sentong lir ta paisa metetdaksü.

Paisa lennirtem dang longjemtsü aser mangdang ayutsü ayongzük. "Pei ajangzüktsü mechi nung nübertem tsüngda telemsa adokdaksüba lennirtemji taila lennirtem lir" ta Zhaleo-i ashi.

"Kaketshirtem dena Naga nung kati ka agizükteptsüla aser talisa kaketshirtem Naga loktiliba atema ochi nung noktaksü aser jembitsü" ta paisa shisem.

# 4buba Mon International Trade Fair & Expo tenzükogo



MP, Phangnon Konyak aser tanga ketdangsürtem 4buba Mon International Trade Fair & Expo 2024 nung tangokba noksa nung angur.

**Dimapur, Aenjeti/January 6 (TYO):** 4buba Mon International Trade Fair and Expo (MITFE) 2024 lapokba sentong January 5 nü Mon jila Local Ground nung agiogo. Iba sentong ya Deputy Commissioner lenisüba nung Mon District Administration-i achaayanga agia liasü.

4buba Mon International Trade Fair and Expo (MITFE) 2024 ya Member of Parliament (Rajya Sabha) S. Phangnon Konyak-i, MLA AC-43, Tapi Wangpang Konyak, Deputy Commissioner, Mon Ajit Kumar Verma IAS, sorkar tenzükertem, lokti tentet balala lenirtem aser jila aser yimtsüng balala nungi shilem agirtem matsüngdang tenzükja liasü.

Sentong nung o jembiba mapang Deputy Commissioner, Mon-i anir District Administration-i, Mon amala kinük nung aliba district ka nung sentong kanga meraketa ayongzükba atema MP-i kanga pelaba lemsatepa liasü. Lai ashiba agi, iba ajanga oset balala ajungketba, shishilembaba terenlok, branding aser local entrepreneurs rongsenketzung jenjang tajungba kümdaktsütsü. Laisa, district terenlok aser rongsenketzung jenjang tajungba kümdaktsütsü asoshi

local temi yangluba osettem aser parnok sempet ajungkettsüji kanga tongtibang, anungji MITFE amala exhibitions aser trade fair tem ya mapangshia ayongzükba agitsüla ta ashi.

Iba den bendenloksema lai, India sorkari agütsüba welfare schemes balala indang lemsatep. Phangnon-i, tang benoka aliba Vikshit Bharata Sankalp Yatra indang metetdaksü aser nüburtem ajak dang yakyaka shilem agitsü aser iba welfare schemes nungi tajangzük agitsü ayongzükba liasü.

Sentong nungsa tetushi tejaoker Wangpang Konyak, MLA-i, MITFE-2024 ayongzükba agiba tajangzük lemsatep aser iba ajanga local rongsenketzung ajungkettsü aser local tem aser talisa lanurtem yongtsü nung entrepreneurship ajungkettsü imlaba lemsatep.

Paisa nüburtem dang, linük kübok tesem balala nungi arua shilem agirtem dang nungi mapa aser tasa tasen balala angazüktsü ajungshi.

Kasa mapang nung Deputy Commissioner Mon, Ajit Kumar Verma IAS-i, anogo 14 agitsü aliba sentong ya January 18 nü tembangtsü aser stalls aser trade fair balala den külemi

nüngtugu artist, kentener aser kentenba telok temi shilem agiba angutsü, ta ashi.

Pai ashiba agi, MITFE ya artisans, kentener, performer aser tanga local art, craft aser sempet balala aketertem nem arok sabang ka agütsütsü asoshi ayongzükogo. Iba sentong ya micro aser small entrepreneur tem nungi osettsüt balala atema shishilembadak lapoktsütsü asoshi brand promotion channel ka tentettsütsü aser sales network atsülangshitsü asoshi kanga tapet asütsü, ta DC-i ashi.

Maneni Union tir Tingtok Konyak-ia, iba amala sentong tulu ayongzüktsüba atema District Administration dang kanga pelaba lemsatepa liasü. Paisa sentong ayongertem nem takokba tashi teyari agütsütsü nangzükba den iba sentong takok nung agiyonga aotsü imlaja ataba lemsatep.

Sentong nung Hamho Ukhong sobaliba saya ka sayu, Hongphoi Group-i Bamboo dance ai aser Phangmei Yanlem o Chahwang teloki ken ka aten, Sentong nung SDO(C) Mon, L. Mongo Khiamniungan, NCS-i tepela o jembiba liasü. Alakteta jaoker aser tanga tongtibang nisungtemi stall tem semdangba sülen iba sentong tembanga liasü.

# Kiphire DPDB senden menogo



**Dimapur, Aenjeti/January 6 (TYO):** Kiphire District Planning & Development Board senden January 5 nü DC Conference Hall Kiphire nung menogo.

Iba senden ya Deputy Commissioner & Vice-Chairman, DPDB Kiphire, John Tsulise Sangtam lenisüba nung mena liasü.

Sentong nung Sangtam-i, attendance kanga metsünga reta benoktsü ta ashiba den züngsem ajak dang senden nung arua adentsü mepeshia metetdaksü. Paisa, züngsemtem dang parnok tasa

aser sentongtem lemsateptsü aser parnok nem nonglokja aliba mapatem nendaka inyaktüsü ayongzük.

Paisa office tekolaktem dang pei tata tesem toktsür maotsü mepeshia metetdaksü, ajita asünungdang pei tata office tem kanga junga inyaksangshitettsü aser nüburtema ajangzüktsü, ta pai ashi.

Senden nung House Department of Minority Affairs kübok PM Jan Vikas Karyakram (PMJVK) scheme kübok Panchayat Hall yanglutsü atema benoka sensak asem.

Kasa mapang nung

Department of KVK, Kiphire-i Power Point presentation ka agütsü.

Senden nungsa Republic Day anogomung atema sensak asem aser line department tem nem mapa balala lemzüktsü aser sentong takok asoshi longjemer inyaktüsü mepeshia liasü.

Maneni Dr. N. Khumdemo Ezung-i züluba kakat; "Technology Assessment through on Farm Trials for Kiphire District" Deputy Commissioner, John Tsulise Sangtam-i sayaja liasü. Senden ya mendenbubai tepela o jembiba sülen tembanga liasü.

# NBSE-i Common University Entrance Test indang metetdaksü

**Dimapur, Aenjeti/January 6 (TYO):** Nagaland Board of School Education-i 2023 küm February 2 nü osang agütsüba dak ajemdaker maneni NBSE kübok Higher Secondary School aser College tekolak ajak dang Central Universities indang Undergraduate Course tem atema admission asoshi Common University Entrance Test (CUET) koda tongtibang iba indang metetdaksütsü osang agütsüogo.

CUET yagi, linük ajunga nung Central Universities (CUs) mesüra tanga participating organizations (State Universities, Deemed aser Private Universities densema) nung admission agitsü atema kaketshirtem nem single window maongka ka agütsür aser talisa yimdak yimtsüng nung alirtem aser kinük nung

alirtem nem maongka agütsüba den University tem den tesendaktep tajungba küma yanglutsü atema maongka agütsür.

Iba tatidang ajanga candidate tem nem Central Universities aser tanga Universities nung admission agitsü atema maongka tuluba agütsür.

National Testing Agency sangdong ka ajanga ashiba agi, taruba CUET-UG ya 2024-25 academic session atema 2024 küm May 15 nungi 31 tashi agitsü sentong yanglua lir.

Iba dak sendakba nung school aser college tekolak ajak dang, Computer Based Test (CBT) mode atema kaketshirtem nem teyari agütsütsü asoshi mock test aser hands-on training agütsütsü mepeshia metetdaksüogo.

# NNC züngsem 4 bendanga agütsü



**Dimapur, Aenjeti/January 6 (TYO):** Assam Rifles-i tanen makai meranga inyakba ajanga Naga National Council (Non-Accordist) züngsem pezü, 9 mm Pistol ka bener Mon district kübok, Wakching nung bendanga agütsüogo.

Züngsem pezü ya 2019 küm nungi inyaksangshia liasü.

Taoba ita ishika Assam Rifles temi item nisungtem den tesendaktep tajung yanglua aruogo aser iba ajanga parnok bendanga agütsütsü ajungmesoa liasü.

# CTN nung All Ward Union-i nisung 4 merenshir

**CTN.Jan.06 (TYO) :** Changtongya town nung January 5, 2024 anogo nung nübortem alidak injang nung nisung pezü nem temerenshi tang nungi küm pungo Changtongya town nung tetsüng majemoktsü All Ward Union Changtongya Town-i ozüng agütsüogo.

o. Lt. Nokpanglemba, Yaongyimsen (2) Sashitemtsü S/o. Lt. Purnoklu, Changtongya (3) Imtisashi S/o. Lt. Limatongzük, Mongsenyimti (4) Watilemba S/o. Lt. Lanusangba, Unger. Anungji, iba ken o ya All Ward Union Changtongya Town aser GBs Union Changtongya town telongjemi tatsü talang ajak asadanger, tarutsü nung item nisungtem ya Changtongya town nung küm pungo tetsüng majemoktsü aser iba telemtetba nung mangara, pei khuret asütsü," ta All Ward Union Changtongya town aser GBs Union CTN külem sangdong ka ajanga metetdaksüogo.

" 5th January 2024 anogo Changtongya town nung public alidak nisung kari injang akhaba dak sendakba lendong maparen nung nübortemi Unger nunger nisung ka tenüng agi Watilemba apu aser pa dang ken o asüngdang dang, pai parnok nisung pezü tenüng yamai ashi : (1) Nokmensangba S/

o. Lt. Nokpanglemba, Yaongyimsen (2) Sashitemtsü S/o. Lt. Purnoklu, Changtongya (3) Imtisashi S/o. Lt. Limatongzük, Mongsenyimti (4) Watilemba S/o. Lt. Lanusangba, Unger. Anungji, iba ken o ya All Ward Union Changtongya Town aser GBs Union Changtongya town telongjemi tatsü talang ajak asadanger, tarutsü nung item nisungtem ya Changtongya town nung küm pungo tetsüng majemoktsü aser iba telemtetba nung mangara, pei khuret asütsü," ta All Ward Union Changtongya town aser GBs Union CTN külem sangdong ka ajanga metetdaksüogo.

# National Integration Tour tananübuba osang

**Dimapur, Aenjeti/January 6 (TYO):** Civic Action Program kübok arrtsü nung aliba yimtsüngtem nungi tanurtem atema Assam Rifles-i ayongzüktsüba National Integration Tour (NIT) tananübuba nung tanurtem Mokochung nungi

Jorhat-i luogo. Honibarnü taoba Miss Nagaland (2019 & 2020) Miss Vikuonuo Sachuu tour nung aden aser team-i Jorhat nung Assam Rifles Dog Unit semdanga liasü, kong Dog Show ka saya liasü.

# 'Bharat Jodo Nyay Yatra' indang logo aser yimyim sayaogo



January 06, 2024 nü New Delhi nung Congress Tir, Mallikarjun Kharge den party lenirtem-Jairam Ramesh aser KC Venugopal nungeri 'Bharat Jodo Nyay Yatra' atema logo aser naklu sayatsüdang tangokba noksa nung angur.

**New Delhi, Aenjeti/January 06 (Agencies):** Honibarnü Congress party-i Rahul Gandhi leniba nung agitsü aliba 'Bharat Jodo Nyay Yatra' indang logo aser yimyim sayaogo.

New Delhi nung aliba All India Congress Committee headquarters nung Congress party Tir Mallikarjun Kharge den party lenirtem- Jairam Ramesh aser KC Venugopal nungeri 'Bharat Jodo Nyay Yatra' indang logo aser yimyim saya.

Iba Yatra indang yimyimji "Nyay ka haq milne tak" (ochi temeden mangu tashi) lir.

Iba sentong nung jembidang Congress Tir Kharge-i, Rahul Gandhi leniba nung agitsü aliba yatra ya linük nung nüburtem

atema rongsenkettzüng, loktiliba aser yimtenren tsütsü ochi temeden angutsü nükjidong nung agir, ta metetdaksü.

Kharge-isa Manipur nung telok ana tsüngda raraba mapang nung Ato kilonser Narendra Modi-i Manipur mesemdangba atema aitsü.

Nüburtem den tongtepratepa parnok yaritsü nungdak, ta shia Kharge-i, Parliament nung tebilemsü onük balala benoktsü merangyonga sorkari onok nem maangka magütsü, aser opposition MP 146 anentsü, ta metetdaksü.

Rahul Gandhi leniba nung agitsü aliba 'Bharat Jodo Nyay Yatra' ya January 14 nü Manipur yimtiba, Imphal nung tenzüksü aser iba yatra kübok

kilometer 6,713 ayimjemtsü.

Iba yatra kübok Lok Sabha constituencies 100, assembly constituency 337 aser district 110 ayimjemba sülen March 20 mesüra 21 nü Mumbai nung tembangtsü.

Ano külen tanga osang ka nung, Honibarnü Congress party otongdar Mahima Singh-i, iba Yatra tenzüksü atema Rahul Gandhi-i Manipur state shim, kechiyong pai iba state nung tensa majungba atema tebilemsü katsür, ta metetdaksü.

Iba yatra ajanga Congress-i kechi ajanzüksü bilemer?, ta asüngdangba langzüdang lai, "Iba ya election atema dang masü saka linük temzüng aser democracy kümzüksü atema lir," ta ashi.

# India nung ano nisung 774 dak Covid putet aser nisung ana asü

**New Delhi, January 06 (Agencies):** Tesüiba ghonda 24 tsüngda India nung ano nisung 774 dak coronavirus putetba sülen ibaji densemabo tang linük nung coronavirus agi teshirangdakpur 4,187 kümogo, ta Honibarnü Union health ministry-i metetdaksü.

Tesüiba ghonda 24 tsüngda Tamil Nadu aser Gujarat na nung coronavirus agi shiranger kaka süogo, ta health ministry-isa metetdaksü.

December 5, 2023 tashi nungbo anogo shia coronavirus case putetbaji 100 den tajemba liasü saka tawa

COVID-19 variant JN.1 putetba den külemi asükwa mongpu ajanga anogo shia coronavirus case putetba teimba-teimba dang kümdar.

December 5 sülen anogo ka kija nung coronavirus case teimtiba putetbaji December 31, 2023 nü nisung 841 dak putetba liasü, aser iba ya linük nung wara tamajungtiba mapang- May 2021 nung putetba den medemdangra shilem 0.2 dang lir, ta ketdangsertemi metetdaksü.

Tang linük nung coronavirus agi teshirangdakpur 4,187

nungjagi shilem 92 bo pei kidang treatment agia tajungba kümdar.

India nung coronavirus wara tamajungtiba mapang 2021 küm May 7 nü kija nung nisung 4,14,188 dak covid puteta liasü aser nisung 3,915 asü.

2020 küm tetenzüklen India nung covid wara tenzüksü mapang nungi tang tashi nung nisung crore 4.5 dak iba tashidak putetogo aser nisung lakh 5.3 süogo.

Tang tashi nung India nung coronavirus vaccine dose crore 220.67 agütsüogo.

# Ration ochimashi ken o nung ED-i TMC lenir Shankar Adhya puogo

**New Delhi, January 06 (Agencies):** Ration scheme nung ochimashi ken o dak sendakba nung Honibarnep züngia Enforcement Directorate (ED)-i taoba mapang Bongaon Municipality nung Chairman aser TMC lenir, Shankar Adhya puogo.

Hokolbarnü ED ketdangsertem team kati West Bengal kübok North 24 Parganas district nung par ki mita aoba sülen anogo ka lir pa apu.

Pa apuba sülen temang tendangtsü atema Kolkata nung aliba hospital kati anir ao.

Brihostibar aonung North 24

Parganas district nung ED ketdangsertemi Shankar Adhya aser Trinamool Congress lenir Sheikh Shahjahan nunger ki mita aodang party pusemertemi parnok nokdang longkak aitba dang masü saka parnok meyong gari raksaja liasü.

Trinamool Congress lenirtem pusemertemi par kima longkak ait aser ED ketdangsertem meyong gari raksatsü. ED team nungi züngsem kati, "Iba tesem jagi nisung ti aru. Iba tesem nungjagi onok ainshi saka parnoki onok amak," ta metetdakja liasü.

Iba tatalokba sülen BJP aser TMC na aiteptep tenzüko.



January 06, 2024 nü Thiruvananthapuram nung 'Viksit Bharat Sankalp Yatra' sentong nung State Bank of India's (SBI) Chief General Manager A. Bhuvaneshwari-i Union External Affairs Minister, S Jaishankar agizükdang tangokba noksa nung angur.

# Taruba anogo ananü tashi state pongu maneni mekongtsü: IMD

**New Delhi, Aenjeti/January 06 (Agencies):** Indian Meteorological Department (IMD)-i, ano anogo ananü tashi Punjab, Haryana, Chandigarh, Delhi aser Rajasthan tesem aika nung kanga temekong asütsü, ta metetdaksüogo.

IMD-i, taruba anogo ananü tashi Northwest India tesem aika nung mepet tzüsü alitsü, iba sülenjibo tajemba akümtsü, ta metetdaksü.

IMD-i Punjab, Haryana, Chandigarh, Delhi, West Rajasthan aser East Rajasthan, West Uttar Pradesh tesem aika nung minimum temperatures ji 6 degrees Celsius nungi 10 degrees Celsius asütsü, ta metetdaksü.

"Iba ya Madhya Pradesh, Uttar Pradesh, Bihar, Jharkhand, Maharashtra nung tesem aika aser Haryana, Delhi, Chhattisgarh, Odisha states tesem kar nung 3-5°C agi normal temperature dang nungi tali asütsü. Iba ya West Rajasthan nung 2-4 degree Celsius agi normal dang nungi tajemba asütsü," ta IMD-i metetdaksü.

IMD-isa January 7 tashi nung Punjab, Haryana, Chandigarh aser East Rajasthan tesem aika nung anepdang aser aonung mepet tzüsü alitsü, iba sülen-a tesem kar nungbo ghonda 24 shi mepet tzüsü alitsü, ta metetdaksü.

"Honibar nungi January 8 tashi West Uttar Pradesh aser West Rajasthan tesem aika nung anepdang ghonda ishika mepet tzüsü alitsü," ta IMD-i metetdaksü.

IMD-isa, January 9 tashi East Uttar Pradesh nung anepdang ghonda ishika mepet tzüsü alitsü aser January 8 tashi West Madhya Pradesh, Bihar, Jharkhand, Assam, Meghalaya, Nagaland, Manipur, Mizoram aser Tripura tesem aika nung anepdang mepet tzüsü alitsü aser Honibar nungi Amongnü tashi Himachal Pradesh, Uttarakhand aser Odisha nung anepdang mepet tzüsü alitsü, ta metetdaksü.

Taruba anogo 4-5 tashi Tamil Nadu, Kerala aser Lakshadweep tesem aika nung tziunglu arutsü, ta IMD-isa metetdaksüogo.

Honibarnü Rajasthan state tesem ajaklen kanga mekongka kümogo aser Sikar nungbo minimum temperature 2 degrees Celsius tashi aluogo, ta weather office ajanga metetdaksü.

Sirohi nunga minimum temperature 4.1 degrees Celsius tashi aluogo, ta parnoki metetdaksü.

Meteorological department-i ashiba agi, Bikaner nung minimum temperature 6 degrees Celsius tashi aluogo; Ganganagar nung 6.5 degrees Celsius, Jaisalmer nung 6.7 degrees Celsius, Jaipur nung 7.4 degrees Celsius aser Chittorgarh nung 7.8 degrees Celsius tashi aluogo.

Anüdoklen Rajasthan nung tesem aika kanga mekongka kümogo; January 8-9 anogotem nung state nung tziunglu sashia arutsüa akok, ta weather department-isa metetdaksü.



January 06, 2024 nü Gangtok nung Union Finance Minister Nirmala Sitharaman aser Sikkim Chief Minister, Prem Singh Tamang na senden amendang tangokba noksa nung angur.



## TIR YIMYIM YIMOBILEM (EDITORIAL)

DIMAPUR AMUNGNÜ, JANUARY (AENJETI) 07, 2024

### Temulung kuremba

**A**senok aika taküm nung tangari jashidaktsüba agi tako chitetbaji amadoktsü kanga tasak aser ibaji bilemtet shia asenok jashir aser mangyangner. Ibaji amadoktsü merangka ma ta asen mulungjangi arupet arur aser iba jagi asen pelanüaka mepelatetter ta asenok aika mulungjang kurema alitsüa akok. Ibayongji lbri 12 :15 nung ashir, " tako süngra kar meiteta adoker iba jagi timtem agüjalir, nenok shinga Tsüngrem taochi magizüki malitsüsa kümdangang." Tetezü asenok taküm nung Tsüngrem taochi agizüka alinung dang asenoki tangar dang taidoktetsü aser asen anema tamajung inyakba ajak amadoktsü. Taküm nung asenok mulung kuremtsüsabaji maparen tapu balala nung ataloker. Karbo tanur asüdag kari mezüngmeshia amshiba agi temulung kanga mejungi yirur alitsü akok. Karbo kidang apuani, adianu aser medemertemi jashidakja alitsüa akok. Ano karbo mapa inyakdak külem medemertemi temulung yirudakja alitsüa akok. Ashiko, item tekuremji nü mulungjang nung bener pelanüka mepelatet alitsüa akok Aji oda, anogo shia item tejashi jagi asen mulung menentsüba asen mapa nunga tamakok ngua alitsüa akok, kechiyong jashia aliba mulungjang nung tajung inyaktsü mebilermer, anungji azükaru masür. Ajisüaka, asenoki metettsüba kaji, ashiko akhidang nisung kari asen mulungjang yirutsüsa inyaker aser jembirtem tobo temulung meyiper mesüra tamajung inyakba ajak to amadoker pelashishia alitsüa akok. Mesüra, asenoki jashir dang ashi, parnoki asen mulung yirutsütsü aser jashidaktsütsü asoshi inyakbabo masütsüa akok. Aji oda, kodang asenoki akhidang tangari asen mulung yirutsüba aser mepeladoktsüba mapatem ajak asen mulung nung kuoka yudir, ibaji asen mulungjang nung süngra tamajung ka süoka ayu ama asütsü aser ibaji ano tanaben meitetsü aser asen dang masü saka tangar a yirutsütsü. Ibayongji Laishibai asenok kümdangshidaktsür. Kasa Laishiba lbri 12:14 nung ashir, nisung ajak den yimjung nung alitsü merangang aser temeshiba koba makaibo Kibubaji mengutettsü, iba temeshibaji arishia oang. Iba Laishiba nung ashiba tajungshi o ya Tsüngremer taochiji lir. Iba o ya asenoki angara, asenok temeshi akümtsü aser asenoki tangar dang taidoktetsü aser asen mulung yirutsütsüsa tangari jembiaaka aser inyakaka asen meyirutsü. Ibaji tangar asen dak jungjunga repranger injang kaloktsüaka mekashiba amai lir. Item ajakji Tsüngrem taochi ajanga lir. Tangar asenok kanga jashitsüsa inyakba agi, asenoki parnok dang teti jashia bilembatsübaji tim dang amai asenoki bilemtsüa akok. Ajisüaka, Tsüngrem o agi ashir, asenok mulung kurema aliba jagi asenokang yirutsü. Tsüngremi aji meteta lir. Atangji, asenoki ken nung atenba ama, ali tembartemibo asenok jashidaktsütsüa akok, ajisüaka asenok jashibaji memetettsüsa mesüra asen mulungjang yirua alibaji maneptsütettsüsa asen Tsüngremji asenok nungi pilar alir masü. Paji teti asenok den lir. Pai asen mulungjang yirur alibaji angur aser asen jashia alibaji Pai meitema repranger. Ajisüaka, kenken asenoki asen jashiba aser timatembaji Tsüngremi mangur ama bilemtsüa akok. Idangji asenok tali tali jashir aser Tsüngrem taochi magizükteti pilaadoker. Tangar dang tai medokteti kurema aliba jagi asenok temenen lar kümdaktsür, iba jagi asenok teti jashia alir. Ajisüaka, asenoki Tsüngrem dang asen mulung yirua aliba aneptsü atema taochi meshira, Pai iba taochi jagi tangar anema kurema aliba tejashi tia nungi asenok kümzüksü. Tsüngrem taochi agidang asenok kümzük aser iba kasa taochi jagi asenok mulung pelaa alitsüsa Pai asenok mulung yirua aliba aneptsütsü.

## OLEMSABANG

### 2024 küm ya-a koda lia aotsü sentong yanglur ???

~ L. Kika Pongener.

Tamasa Tir Yimyim osang kaket azünger ajak dang küm tasen salem metetdaksür. 2023 küm suia-ogo aser küm tasen ka nung ayaokogo. Aji oda, küm tasen ka nung ayaokdang nubur ajunga mulongjang nung 2024 küm ya kechi koma ka asütsü (?)...ta tasüngdangba aika arua alitsü. Atangji, nubur aika mulongjang nung 2024 küm jagi ozü kibong, ozü arogo, ozü yimden, ozü lokti aser ozü sorkar asoshi-a kechi ka bentsüa lir (?)...ta asüngdanga alitsü. Kodang asenoki tarutsü nukla/mangdang yur inyaka aotsü sentong yangludir, idangji tamasa tesuiba mapang inyaka aruba mapatem khen meyipa reprangshitsü kanga tongtipang lir, aser tamakok kar lira kodaser tamakokji angu (?)...ta bushidangtsüla, aser takok ngua inyaka lira, ano iba nungji ajemdaker tarutsü nung tajungtiba inyaktsü asoshi mangdang tuluba ayutsü aser sentong tajung yanglutsü kanga tongtipang lir.

**Kibong** : Tanü asen Naga nunger kibongtem tia reprangdangra, kibong aika molumi tia nung lir. Kibong nung apuani tsüngda temeim mekongga akümba, tsürabur o chirnur tsüngda tesendaktep raksar kibong aika aiatai tia nung lir. Tesasatsüka, ano kibong karbo kaa-ita jangradema lia aliba, meyiper sentsüh agi tsübanger sensak tiai yir ala-ashia alitsü akok. Iba ama tiaji kodaser kong nungi tenzük (?)...ta teraji bushidangra, kibong karbo rongsen timyimi ketdang masüba ajanga aser kibong karbo pei kibong jenjang dak alia libaliroba ajanga adokba asütsü. Kinungbur aika yi lar kümer shiruru tia nung, pei kinungtsü aser chirnur kong koda alir memeteti taküm lisa-a alir aika lir. Ano kinungtsür aika pei kibong jenjang memetet, pei kinungbu jenjang memetet 'High Standard' nung suoshi suboba, libaliro 'Life Style' kanga 'Luxurious Life' nung aliba aser pei kinugbur dang tamakangtsü akangba agi kinungbur aibelendaktsüba....Iba ama tali mashi libaliroba agi kibong sentsüh agi tsübanger sensak tiai aiba aika lir. Ano chirnur aika mozular lar/yi lar kümer tsürabur timtemdaksüba, ano chirnur aikati pei tsürabur jenjang masadangi senotsü meshiba aser lalushiponga, taküm lisa-a aliba agi kibong sensak tiai yidaktsüba aika lir. Asen Naga lima nung küm ishika lanurtem Drugs achiba tera tajemba kümer ayung-ayunga lia aliba, ano tang ya asentenshia Drugs nungja tasen ka 'Sun Flower' achiba Naga lima ajak nung kanga bulua angur. Anungji tanü asenok kibongtem atema iba tongpang ya kanga tesashi tongpang ka lir. Aji oda, kibongtem atema dang masü saka arogo, yimden, loktiliba aser sorkar atema-a iba ya tebilemtsü khuret tuluka asütsü. Yamala külitem ajanga kibong aika molumi tia nung lir. Aji oda, kibong mejungra yimden, arogo aser loktiliba ajak aser sorkar dena majungtsü. Anungji taküm 2024 küm ya, asen Naga nunger ajunga kibong meyipa reprangshiba aser yanglushiba küm ka sudaktsüdi.

**Arogo** : Tanü Naga nunger arogotem tia reprangdangra, arogo aika telung nung telemsa aser mepetmesu tia nung lir, aser tenzükler/tenzükla tsüngda nung kati ka sempatepba, kati ka majinuba, kati ka den tsükchitepba agi sunga lir. Pulpit nungibo kati ka den meimtepa, putepa, jungtepa alitsüba indang sayutsüngir, saka parnok tsüngda nungbo yamaji malir. Tesasatsüka, arogo aika nung tenzükler karbo achi-ajem mazüok aser masüngtet agi sunga lir. Ano kanga tesasatsüka, Tsüngrem tenzükler aika rongsen ketdangsuba nung ochimashi, rongsen nung dang rangloker tenzükba, rongsen ketdangsuba nung teka amuoka amshitsü dang jangraba, taki-tarutsü 'Facilities' peria alidak dang tenzükknuba Tsüngrem tenzükler karbo lir. Tanü lim arogo aika rongsen ketdangsuba nung ochimashi, lalushipong, chidiyungdiba agi sunga lir. Tanü arogo aika terenlok mapa (Development) nung dang rangloker inyakdang tenyaba mapa (Mission) aser tanela anir aruba mapa (Soul winning) senzüka toktsüba arogo aika lir. Lim arogotem aika 'Out reach mission' nung ranglokdang 'Home Mission' tamakok nung lir. Lim arogotem aika tenzükler/tenzükla tsüngda tashi raktepba, kibur akümtsü merangtepba aser tashiyim amshiba agi sunga lir. Anungji 2024 küm yabo asen Naga nunger arogotem meyipa reprangshiba aser yanglushiba küm ka sudaktsüdi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

# Nüngtugu sayutsünger, Junior Hill arrshi küm 87 nung süogo



Junior Hill

**January 06, 2024:** Nüngtugu sayutsünger, Junior Hill-i revival sentong 1,800 nung sayutsüngia liasü; pa arrshi küm 87 lia alima nungi pilaogo.

Hill ya küm 50 dak tali toklang tenzüker sayutsünger ka liasü. Bodhbarnü (January 3) pa Hartselle, Alabama nung par kidang lia süogo.

Osangtajung kentener, Gerald Wolfe-i Facebook post ka ajanga Junior Hill asüba atema mangyim jashi lemsatsep.

Wolfe-i, "Hill ya sayutsünger tajungtibatem rongnung ka liasü. Junior den külemi tenzüksü atema ni yongaa liasü. Pa ya temeim aketba aser tanela jenti kümzüksü jangraba lenir ka liasü. Nai pa memeimi

melitetsü. Atangji ni pa kanga meima liasü," ta metetdaksü.

"Pa joko asenok den mali, anungji iba ya tejashitsüka lir, ajisüaka tang pa Kibuba den külemi alitsü. Tesünep nung anisüngzükan, adianu Junior. Kobi melii asenok ajuruteptsü," ta Wolfe-isa lemsatsep.

Alabama Baptist State Board of Missions nung taoba mapang office of evangelism nung director, Sammy Gilbreath-i, "Tanü linük nung tanela anir arurtem tajungtibatem rongnung Hill densema lir. Pai tanelatem kümzüka ajanga tanübo Kibuba yimli nung nisung jenti lir," ta ashi.

William Junior Hill ya 1936 küm July 5 nü aso. Kibong nung

tanur pongu rongnung pa tanubo liasü aser pa arrshi küm 19 asüdang pa tajaba pai meteta liasü. 1967 küm nungbo pa toklang tenzüker sayutsünger ka aküm.

Junior Hill-i Samford University nungi bachelor degree angu, New Orleans Baptist Theological Seminary nung master degree angu, Liberty University nungi honorary doctorate angu aser Covington Seminary of Georgia nungi Doctor of Divinity degree angu.

Küm 50 tsüngda pai revival sentong 1,800 nung sayutsüngia liasü, iba dak alia conferences, state conventions aser seminaries aika nung jembiogo.

1989 küm Las Vegas nung Southern Baptist Convention senden aliba mapang nung pa tatong Tir shima liasü. Pai kaketa aika zülu aser item rongnung pa taküm otsü kaketa 'They Call Him Junior' densema lir.

2021 küm Alabama Baptist Pastors Conference alidang pa nem 'Fred Wolfe Lifetime Pastoral Ministry Award' agüja liasü.

Junior Hill-i pa kinüngtsü, Carole den chirnur ana, semchir pongu aser tanaben semshir pongu toktsür pilar.

Pa den tatembangbuba asüpila sentong January 9 nü Decatur, Alabama nung aliba Westmeade Baptist Arogo tenla kidang agitsü.

## ANOGO ABEN TSÜNGREM DEN

### TSÜNGREM TSÜBURTEM ASOSHI TENANGZÜKBATEM

Kechiyong ne ket agi züsentetba nai achitsü. Na tepelatsü alitsü aser ne den junga alitsü.

-T. Ken 128:2

Meimchir taküm nung pei sasa meranga inyaka züsen itemji chiteta jemteta aliba jangratem mulungsü aser tepela tetka alima nung tanga tepela maka ta ashitsü kecha terata maka. Saka tanü bilemdangra nisung aika tachitajemtsü, tagitarutsü tajungba talubosa nangdaka yur, mulung masü tepela agi anünga alibapur jenti angur. Meimchiri aiben yamai aroka meshisadanger asü? "Item taka tait talubo rongsen aser jangratem ya koma kolen nungi? ta, mesüra item ajak ya Tsüngrem ket nungiang aser item ya senmang amanga, chia jema pelaa alitsüji Tsüngremer angati sempet." ta mebilemer aser mangateter.

Sayutsünger 2:24 25 Nisung asoshi pei züsen nung tepela ngua chia ajemba dak alema tajungba kecha maka. Ya Tsüngrem ket nungiang ta ni angu. Kechiyong pa meteni shibai chitet aser jangratema litet! Meimchirtem asoshi Tsüngrem o kanga aroka shisadanga, iba nung kanga nendaksü koda tongtipang lir. Temeshi laishiba nung nangzüka akaba temoatsü aser azükaru ajak ya tajunger tamajunger ajak asoshi sempeta moatsütsü asoshijembia nangzüka ayuba masü, saka ibai Kibuba tsüngken tsübua pa dang tashi angartem kisung moaja sempettsütsü tenangzükbatem lir. Khristan tamanger tajung ka ka ama Tsüngremer tenangzüka senmang amangtetsüsa asen taküm pa madang shitak lir ma? Sarasadema shisadangi

# Gaza nunger meyrjang aikati Yisu agizüktsü: Taysir Abu Saada



Taysir Abu Saada aser pa kinüngtsü Karen Saada

**January 06, 2024:** Tang Israel aser Hamas na tsüngda maneni raraba mapang nung taoba mapang kiralongrar kati, Gaza nung Palestine nunger meyrjang aikati Yisu agizüktsü, ta ashi.

Taysir Abu Saada ya taoba mapang Fatah kiralongrar telok nung züngsem ka liasü, ajisüaka 1990s mapang nung pai Yisu Khrista agizüka Khristan aküm. Abu Saada ya Khristan ministry- Hope for Ishmael tentetsang lir.

Kaket zülur nüngtugu, Joel Rosenberg den jembidang Abu Saada-i, Israel aser Hamas na tsüngda rara aser Hamas-i yazü jembiba ajanga Gaza nunger

aikati Islam yimsü toktsür Khristan yimsü dangi meyiptsü, ta ashi.

Joel Rosenberg ya AllIsrael.com nung yimobilem zülur lir aser pa ya Middle East indang junga angateta alir mongin Laishir ka lir.

Saada-i, "Hamas ya tangatetba ka lir aser iba tangatetbaji Gaza Strip nung dang masü saka alima tesem ajaklen proker. Ajisüaka Tsüngrem sentong ka lir. Ni amanger, Arab aser Yihuda nunger sentongji iba shilem ka lir," ta ashi.

"Ibayongji ni tanaben Temeshi Lima nung lir, ni Gaza Strip-i oa yangershiba nung shilem agitsü.

Teraksatsüba jenti atalokogo aser Palestine nunger aikati item timtem ajangshia ola madokibo malitsü, saka 'ya kechiba'? ta asüngdangtsü. Tsüngremi Gaza nung mapa tulu inyaksü aser iba nungji ni-a shilem aginer," ta Saada-i metetdaksü.

Saada ya Gaza Strip nung aso aser 1967 küm Six-Day War sülen pai Yihuda Israel nunger kanga sempaa liasü. Pa tanur asüdang par kibong Saudi Arabia aser Qatar-i oa ali. Tesülen pai kidang nungi jena oa Fatah kiralongrar telok nung dena taoba mapang Palestine Liberation Organization nung chairman, Yasser Arafat pusema

rara nung shilem agia liasü.

"Six Day War sülen ni kanga jashia liasü aser ni Yihuda nunger kanga sempa. Israel nunger anema raraba tongbang aika nung onoki tamakok angubaji kechi kuli ajangaar ni mangateti liasü. Israel dang nungi onok nütsüng teimba liasü, raraba hadir teimba liasü saka onoki parnok anema rarayonga tamakok dang angu," ta pai ashi.

Tesülen pai 'legal' tsütsü timtem kar ajurua US-i ao aser yangji pai America tsür ka den kibong aküm. Pai Khristan ka ajuruba sülen pai Yisu Khrista agizük.

Khristan kati Saada dang, "Nai atangji tesünep ngunera nai Yihuda nunger meimtsüla," ta ashi.

"Ni kanga aoksa, kechiyong Yihuda nunger meimtsüji tamakoktsü. Ni Yihuda nunger sempar, ta pai meteta liasü," ta Saada-i ashi.

Khristanji aser Saada nati Laishiba külemisa azüng aser tesülenbo Saada-i Yihuda nunger atema sarasademtsünüa ait.

"Yihuda nunger atema sarasademtsütsü kü melung nung jembia. Ni 'Oh, Tsüngrem ner nübur, Israel nungertem moajang. Tsüngrem, parnok nangzüka lima nung adenshidakjang' ta ni sarasadema liasü," ta paisa lemsatsep.

Saada-i Rosenberg dang,

'Alima ya tatembanglen kati arudar ta ni amanger," ta lemsatepa liasü.

Saada-isa, tang Israel aser Gaza na tsüngda rara ajanga teraksatsüba jenti lir, saka Gaza nunger aikati Khrista dangi meyiptsü, kechiyong parnok atema teimlaji Khrista dak dang lir, ta ashi.

Paisa, "Alu aruhtsü jenti lir," ta shisem.

Tamalen osang ka ajanga, Gaza Strip nung Muslim nunger tebur aikati pongmang nung Yisu Khrista anguba sülen Khrista agizükogo, ta metetdakja liasü.

Kaketzülur aser Khristan temeden atema jembir, Michael Licona-i mezüng online ajanga iba osangji lemsatepa liasü.

Michael-i, tongbang rara tiyongtsü nung Tsüngremi mapa inyakdar, tang rara mapang nung Muslim nunger aikati Yisu Khrista agizük, ta metetdakja liasü.

Michael Licona ya Houston Christian University nung New Testament professor inyaker.

Pai 'The Case for the Resurrection of Jesus' aser 'Paul Meets Muhammad' kaketa na densema kaketa aika zülüogo. Pai Palestine nung aliba underground Christian ministries aika den tongtepratepa jembiba mapang Muslim nunger aikati Khrista agizükba osangji jangjaa liasü.

### AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

**Shiyim**

(n) mapa asungdanga mesüra tetoktepdak adentsü atema shia züluba (application form)

\* Government mapa kar atema lai shiyim ka meshia renermer agütsü.

**Shin**

(v) tarutsü nung ataloktsüba indang ashiba ( prophesy)

\* Tenla kidang nisung kati kanga shin.

### OLONG PAITEP # 6659

1		2		3		4	
		5		6		7	
8							
		9					
	10						
						11	12
		13			14		
15					16		

**TIPLIN**

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T \_\_\_ lu - (3)
- 10. Takdang temalen - (9)
- 11. Tesa \_\_\_ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüngsak-mopung - (5)

**LANGTSÜNGLEN**

- 1. Reprangdaksü - (4)
- 2. \_\_\_ ur - (3)
- 4. Kiojen yangludak - (6)
- 6. \_\_\_\_\_ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemtdak - (6)
- 12. \_\_\_ adenshi - (4)
- 14. Tsünüsenbongtsü adokdak - (3)

### OLONG PAITEP # 6658 TELANGZÜBA


**TIPLIN :**

- 2. Anükalem, 4. Mesak, 5. Epet,
- 9. Meimtep, 11. Posü, 12. Patak,
- 13. Tekettsü.

**LANGTSÜNGLEN :**

- 1. Kümbang, 2. Ayak, 3. Leptep,
- 6. Nati, 7. Yiar, 8. Sangküm,
- 9. Metsük, 10. Mazü.

### NAI-A YA METETTER MA



India-i anünglak nung ano otsü tasen ka yanglutetogo aser ibaji Aditya-L1-i pa tatongtsü atongba lir. Aditya L1 ya India asoshi mezüngbuba space-based observatory lir aser Sun-Earth Lagrange Point 1 meketa lir. Iba point ya alima nungi 1.5 million kilometer pilar lir. Iba mission ya yaküm September 2 nü Indian Space Research Organisation (ISRO)-i tenzuka liasü.

### Manipur CM-i College Fagathansi Mission tenzüksü



**Imphal, January 6, 2024 (Agencies):** Manipur Chief Minister N. Biren Singh-i Moirang College nung College Fagathansi Mission tenzüksü.

Bishnupur District kübok Moirang Assembly Constituency nung CM Biren-i terenlok mapatong aika atema lung azüngtsü.

"2017 küm state sorkar akümba sülen health aser education sector nung temulung agüja arur. Sorkar school tem nung shisaliok jenjang tajungba akümtsü atema School Fagathansi Mission tenzük" ta Biren-i ashi.

Assembly Constituency shia

nungi school kaka, ajak senteper school 60 tashi School Fagathansi Mission kübok dendaksü. Mezüngbuba shilem nung item school infrastructure renlokdaksütsü. Iba sülen ano school 60 bendenloka renlokdaksütsü ta paisa ashi.

"Iba mission takok ngua inyakba ajanga Manipur nung aliba sorkar school aika nungi kaketshirtemi Arts aser Commerce Stream nungi toppers adokogo. Ano School Fagathansi Mission 2.0 kübok school 120 bendenloksü aser iba ajanga sorkar school 240 tashi iba mission kübok adentsü" ta Biren-isa metetdaksü.

"College Fagathansi Mission

ya college nung infrastructure renlokdaksütsü aser higher education facilities tajungba agütsütsü atema lira ser iba ya School Fagathansi Mission sülen tenzük" ta pai ashi.

"Iba mission kübok college 24 shimogo aser college shia nung Rs 2.5 crore endoka mapa inyaksü" ta Chief Minister-isa ashi.

"Shisaliok ya kanga tongtipang lir aser shisaliok shitak angazükba ajanga nisung ajaki Reserved Forest wazüka ayutsü angatetsü kechiyong iba lipoküm rakxaa aoba anentsü. Iba ya Forest Act aser Indian Constitution nung lateta lir" ta Biren-isa shisem.

Manipur sorkari mepetmesü ajanga kongshirtem akokba tashi yaritsü meranger aser sorkari yimjung bener arutsü merangba nung public-i amalitepa yariteptsü mepishir, ta pai ashi.

Iba sentong nung Chief Minister Biren-isa Moirang College, Oriental College aser Imphal College nung Principal tem nem College Fagathansi Mission kübok Work Orders agütsü.

Paisa "Cheingak Khonghou"- Supporting the Journey kübok beneficiary kaketshir 10 nem Rs. 10,000 aser smart phones agütsü.

### Tarun Gogoi-i aniba Congress sorkari 5 lakh D-voters adokdaksü

**Guwahati, January 6, 2024 (Agencies):** Assam nung Tarun Gogoi-i aniba Congress sorkari küm ka tsüngda 5 lakh D-voters adokdaksü ta All India United Democratic Front (AIUDF) tanishir Badruddin Ajmal-i ashi.

"Congress sorkari iba ya agütsütsü, ibaji agütsütsü ta ashi. Shibai detention camp yanglu? Shibai D-Voter tebilemtsü adokdaksü? Shibai NRC khuret adokdaksü? Tarun Gogoi-i aniba Congress sorkari iba ya inyak. Tesüiba nung Prafulla Mahanta-i aniba sorkari 1 lakh D-Voters adokdaksü saka Tarun Gogoi-i aniba Congress sorkari küm ka

tsüngda 5 lakh D-Voters adokdaksü" ta Ajmal-i Baghbor nung sentong ka nung jembidang ashi.

"Congress-i tesüiba nung Muslim nung ashioktsütsü. Parnoki Muslim nung mokdang. Congress-i land patta tem magütsü, D voters adokdaksü, detention camps lapok, schools aser colleges magütsü, tesayuba magütsü. Muslim nung alidak school ka alinunga tanurtemi iba school nung azüngtsü maongka mangur. Anungji 2024 elections nung kü nem mapa inyaksü maongka agüjang" ta Ajmal-isa ashi.

Muslim nungeri shisaliok wadang nung tejakleni aotsüla. Muslim nungeri shisaliok tsütsü tejakleni ora Ajmal ama nisung nungdak mali. Muslim nunger tanurtemi meimchir tajung aser tanishir akümtsü merangtsüla. Yimtenren lennirtemi jembiba mangatsüla. Election mapang sen nükshia tereprang" ta paisa ayongzük.

"Yimtenren lennir aikati election nung takok angu aser parnok atema kiojentem yanglu saka Ajmal aser Ajmal Foundation-ibo school aser college tem lapok" ta AIUDF tanishir Ajmal-isa ashi.

### Assam Police-i designated camp nung meindokba kuli meshir: NLFB

**Kokrajhar, January 6, 2024 (Agencies):** National Liberation Front of Bodoland (NLFB)-i ketdangsurtem dang parnok Kokrajhar nung aliba designated camp toktsür odaktsüba atema kuli meshiogo.

"Police-i jeli osang kecha melii yasüng tashiyim agi designated camp nungi meindok. Iba ya yimtenren tasa ka lir" ta NLFB general secretary N Panjari-isa ashi.

"Parnoki kechiba onok iba tesem nungi meindok kuli agütsütsüla kechiyong tesüiba küm pezü tashi onok iba camp nung lia arur. Kechiba parnok kecha mashi? Küm pezübuba nangang kechiba onok dang camp toktsür aotsü ashir? Iba kuli tejangja ashitsüla. Iba ya police order masü saka yimtenren tasa ka lir" ta Panjari-isa ashi.

Hokolbar nikongdang Kokrajhar police-i Chandamari nung NLFB indang designated camp amak. Parnoki NLFB

züngsemtem dang iba camp toktsür aotsü tuyu. Idangji police aser NLFB züngsemtem tsüngda mangatetep adoka raratep aser tatem nung NLFB züngsemtemi camp toktsür ao.

Tesüiba mapang onok shia nem Rs 2 lakh agütsütsü aser designated camp toktsür kidangi aotsü ashi saka ibaji tamakoktsü, ta NLFB general secretary-isa ashi.

"Onok tebilemtsütem Rs 2 lakh agi angatetteptsü makok. Onok tebilemtsütem angatettepra onoki sen manginür. Onoki ahangba rongnung mezüngbubaji NDFB founder-chairman Ranjan Daimary tepuokdak nungi chiooktsüla, kechiyong pa BTR Peace Accord nung sign asür rongnung ka lir" ta paisa ashi.

"Ozü züngsem 63 nungi 65 tashi tepuokdak lir. Ano NLFB commander-in-chief M Batha tepuokdak lir. Ozü lennir aser züngsem ajak tepuokdak nungi chiooktsüla. Iba sülen onoki

olemteptsü. Onoki künü anogobo telok loksaktsü saka khen nung dangbo meloktsaktsü. Onok tebilemtsütem koktetba sülen onok loksatsü" ta Panjari-isa ashi.

Yasüng Kokrajhar Additional Superintendent of Police (Crime Branch) Prithviraj Rajkhowa-i anir Assam Police telok kati kanga dang ajungbena NLFB camp telungi ai aser designated camp nung aliba züngsem 53 dang camp toktsür aotsü ashi. Parnok tsüngda tebang agi raratepba sülen NLFB züngsemtemi camp toktsür ao.

NLFB indang designated camps ana lir. Ka Kokrajhar nung aser ka Udalguri nung lir. Assam Police-i yasüng tashiyim agi Kokrajhar camp nung alirtem meindokogo aser Udalguri camp nung alirtema meindoktsü tetuyuba agütsütsü ta osang angazük saka tang tashi police-i Udalguri nung mapa kecha meinyak lir.

## Bangladesh nung polling booth tem rongtoktsü



Bangladesh nung polling booth rongtoktsüba noksa angur

**Dhaka, Aenjeti/January 6 (Agencies):** Deobarnü general election agitsü lia Bangladesh nung Polling booth tem rongtoktsüogo. Train ka maka nisung pezü tashi tepsetba sülen ghonda ishika dang lir Polling booth tem ya rongtokja liasü.

Honibarnü police-i ashiba agi, mejangjaba nisungtemi polling station pezü densema primary school pongu nung mi senoktsü.

Linük yimtiba Dhaka tezülen Gazipur nung mi senoktsüba ya police temi bushisüngdangdar. Mi ya ayaterem nung senoktsü aser election inyakyim nung minprongtsü nükjidong nung asütsü ta temulung melemi bilemer. Bangladesh nung opposition party tongtibai election nung shilem magitsü asoshi tenangzükba agütsüogo. "Mepetmesü adoktsü ta bilemba tesemtem onoki tesashiba meita atadar," ta Gazipur police tekolakba Kazi Shafiqul Alam-i ashi.

Election commission-i ketdangsurtem dang polling station tem temeket nung security akangshitsü atema asüngdangogo.

Mejangjaba nisungtem yagi Moulvibazar aser Habiganj district tem nung polling booth tem maka liasü ta ashiba den kasa tatalokba ya taoba anogo ana tsüngda tanga tesem nunga atalokba osang agütsüogo.

Police temi Khulna district nung Brestibar aonung voting station ama amshitsü aliba school ka nung mi senoktsü

meranga aliba mapang nisung ana puogo. Iba sülen Hokolbarnüa primary school ka nung mi senoktsütsü merandangba nokdangogo, ta district indang police tekolakba Saidur Rahman-i ashi.

Bangladesh nung opposition party tongtiba Bangladesh Nationalist Party (BNP) aser tanga opposition party tem aikati elections nung shilem magitsü telemtetba agiogo.

Ato Kilonser Sheikh Hasina ya Deobarnü election agiba sülen term pezübuba adoktsü tejangja, koba observer temi aitsüogo.

Khaleda Zia-i aniba BNP puri Honibarnü nungi tenzuka ghonda 48 atema longkak aitba sentong ka ayongzükogo aser nüburtem dang vote magütsütsü mepeshiogo. Parnoki ashiba agi, sorkari election ya kecha tebandang makai agitsü ta kuli magütsüteter.

Honibar anepdang party pusemertem telok tila kati Dhaka kübok Shahbagh tesem nung longkak aita liasü aser parnoki nüburtem dang longkak aitba sentong nung adentsü ayongzuka liasü. Kasa mapang nung left-wing longkak aiter 200 shi National Press Club kima longkak aita liasü.

"Sorkari maneni mi den asayar. Sorkari tasa tejen amshia telok ka dang ajangzükba election agi tenzükogo," ta BNP ketdangsur tejen Ruhul Kabir Rizvi-i ashi.

Kasa mapang nung police-i opposition party züngsem pezü

puogo. Parnok ya Hokolbarnü train ka nung mepetmesü adokdakja amakba atema aitsüogo. Iba lendong nung nisung pezü asü.

Honibarnü anepdang linük yimtiba nung police temi pua alirtem rongnung BNP lenir tejen Nabiullah Nabi den tanga party activists trok densema lir.

"Nabi-i senotsü teyari agütsü aser iba train amaktsü atema sentong yanglu," ta Dhaka Metropolitan Police otongdar Faruk Hossain-i AFP news agency dang phone ajanga ashi.

Foreign Minister AK Abdul Momen-i ashiba agi, iba ledong atalokba mapa ya asadanga iba ya linük nung democratic inyakyim ka raksatsütsü merangba lir.

Ajisüaka BNP otongdar AKM Wahiduzzaman-i AFP dang ashiba agi, tesem balala amakba ya tang yimsüsüa aliba sorkari jelia sentong yangluba ka lir, koba BNP indang non-violent movement raksatsütsü nükjidong nung inyakba lir.

Paisa, sorkari ochi mashi inyakyim benoka agiba election nungi nüburtem tebilemba piladaktsütsü nükjidong nung iba jenjang agir, ta ashi.

Train nung mi adokba sülen nisung ti tashi kanga mejungi yirua liasü.

"Tanur ana densema yirur tiprongla respiratory tracts rongogo," ta Dr Samanta Lal Sen-i ashi. "Onoki parnok kanga junga asadangdar," ta pai osangbenertem dang ashi.



Dhaka: Bangladesh kübok Gopibagh tesem nung intercity Benapole Express train nung mi adokba sülen nisung pezü süogo. Dhaka Tribune sangdong ka ajanga ashiba agi, iba lendong ya Hokolbarnü 9:5 nung ataloka liasü aser mejangjaba nisungtemi iba train indang compartment pongu tashi nung mi senoktsü.

## MOLUNGNEN O

"Ni rara tajungji rarago, ni alizungji tonga asemogo, ni tamangji yuogo"

~ 2 Timothy 4:7

**Wb. Tiakaba Longkumer** (Longsa)  
S/o. Wb. N. Wati Longkumer, asüko nung yariteper ajak dang pelaba olen ka iba kaket ajanga lemsar. Talisa, Doctors & Nurses (Hematology Department) GMCH Guwahati, kinungertem, tembartem, Arogotem, kiongertem, kija aser lokti shirnokisa yimya balala nung temeim, rongsen aser shirangba mapang tepiyong sarasadem agi yaritepogo, ajak dang kanga pelar. Tsüngremi nenok ajak moajang ta ozü sarasadem. Amen.



Lt. Wb. Tiakaba Longkumer

Aso: 08/02/1978  
Asü: 01/01/2024

- Temeim kinungtsü, jabaso ana, tebu, tetsü, adianutem aser kinungertem.

## North Korea-i artillery drill ayongzuka agi

**Seoul, Aenjeti/January 6 (Agencies):** South Korea den tziyim nung mangatetep aliba arrtsü anasa North Korea-i artillery drill ka ayongzuka agiogo, ta Seoul nungi ketdangsurtemi ashi. Kasa tesem nung North-i drill ayongzuka agiba ajanga South-ia telangzuba agüja drill ayongzuka agiba sülen anogo ka lir North-i ano maneni Honibarnüa drill ayongzuka agia liasü.

South Korea indang Joint Chiefs of Staff-i ashiba agi, North-i Honibarnü anüolen tziyim nung arrtsü anasa injang 60 dak tema kha liasü. Joint Chiefs of Staff-isa, North dang tensa tamajungba mekümdaktsütsü atema iba amala inyakyim anentsü metetdaktsüogo.

Joint Chiefs of Staff-i, South Korea-i lisopurtem amokmerentsüsa North Korea-i artillery drill tem maneni ayongzuka agira South Korea-ia jenjang tapet agitsü, ta ashi.

Hokolbarnü North-i kasa tesem nung artillery shells 200 shi akha aser iba ajanga South

Korea-ia telangzuba agütsütsüsa aküm. South Korea indang Defense Ministry-i ashiba agi, linük anaprongla nungi sepaitemi tziyim nung anüolentip len arrtsü leni artillery injang khatoka liasü. Local media sangdong balala ajanga ashiba agi, South Korea-i injang 400 shi khatoka liasü.

South Korea sepaitemi drill ayongzuka magi tsüngda ketdangsurtemi anüolen tziyim arrtsü anasa aliba asetkong pongu nung alirtem dang teküzmükba tesem bushia aotsü asoshi tetuyuba agütsü, kechiyong North Korea-i meyiper injang khaloktsütsü ta bilema liasü.

Korea linük ana tsüngda tziyim nung arrtsü kanga junga lateta maliba ajanga 1999, 2002 aser 2009 küm azütokshia raraogo. 2010 kuma March ita North-i South Korea indang warship ka poksatsüba sülen South Korea nung sailor 46 tepset aser ano November ita Yeonpyeong asetkong nung bomb pokloktsüba sülen South Korea nung pezü tepseta liasü.

## Japan menoknok lendong nung asür 100 ajangogo

**Tokyo, Luchii/December 6 (Agencies):** January 1 nü Japan nung menoknok anokba lendong nung asür 100 dak tema jungogo. Teküzmükertem aser nüburtemi ki ajareper alibatem nungi tasümgang agitetsü merangdar.

Küm ti tsüngda linük nung menoknok tesashitiba anokba sülen taküm alirtem ngutetsü timla makai kümdar. Ajisüaka Ketdangsurtemi Honibarnü ashiba agi, nisung 200 shi tang tashi monguteti lir.

Japan anüolen tziükümlen 7.6 magnitude menoknok ka anokba sülen Hokuriku tesem nung ki 23,000 nung electricity makai kümogo.

Honibarnü 1:00 ako tashi nung Wajima yimti aser Anamizu jila nung nisung tertrok asüba osang jangjaogo aser iba ajanga asür 110 jungogo, ta Ishikawa prefectural sorkar aser tanga source temi osang agütsüba Kyodo news agency-i metetdakja liasü.

Yimti ajak rongnung Wajima yimti nung nisung (59) timtiba asü aser Suzu nung nisung 23

süa liasü. Iba lendong nungsa nisung 500 dak tema yiru aser parnok rongnung 27 bo kanga mejungi yirur lir.

Alima nung tectonic plates pezü Japan nung ajuruteper aser iba ajanga mapangshia menoknok anoker. Japan nung kümshia tremors noklang aika ajangshir, ajisüaka teraksatsüba kangabo mataloker.

2016 küm sülen tang mezüngbuba Japan nung menoknok anokba mapang nisung timba süogo. 2016 küm Kumamoto nung menoknok anokba sülen nisung 276 asü.

2011 küm tziyim telung nung magnitude 9 tesashi menoknok ka anokba sülen tsunami tulu ka aru aser iba ajanga teraksatsüba tulu bener arutsüba den Fukushima nuclear plant daka kongshia liasü. Iba lendong nung nisung 18,500 asü.

Kasa mapang nung shingiaia mimlai lia North Korea lenir Kim Jong Un-i Japan Ato Kilonser Fumio Kishida den asükhü lemsatepogo, ta Korean Central News Agency-i Honibarnü metetdaktsü.

# Nagaland aser Hyderabad na tananübuba asaya osang



**Dimapur, Aenjeti/January 6 (TYO):** Nagaland aser Hyderabad na tang asaya aliba Ranji Trophy tananübuba asaya nung Nagaland team run 439 agi tesülen liasü, ajisüaka Hyderabad team nungi bowler temi kanga junga asaya Nagaland team nem run yanglutsü asoshi kecha maongka magütsü.

Hyderabad team nungi bowler tem rongnungi Tanay Thyagarajan-i over 17 nung wicket 5 agi. Parnok rongnungisa CV Milind aser

Kartikya Kak nati wicket anana agi aser T Ravi Teja-i wicket ka agia liasü.

Nagaland team-i asayar ajak out sür run 153 dang yanglutet. Parnok rongnungi Jaganath Sinivas-i dang tera junga asayatet aser pai ball 79 nung run 49 yanglua liasü.

Nagaland team nungi asayatem ajak lunch sülen out asü aser parnok follow-on achi. Parnoki run 321 agi Hyderabad team memenepi liasü.

Tanabuba innings nunga Nagaland team-i junga

masayatet aser parnok over 34buba nung run 127 yanglur ajak out süatok. Hyderabad team nungi CV Milind-i wicket 4 aser Tanay Thyagarajan-i wicket 3 agia liasü.

Nagaland team atema Sumit Kumar-i run 62 aser Jonathan Rongsen-i run 23 yanglua liasü.

Iba asaya ya Hyderabad-i innings ka aser run 194 agi kokogo.

Nagaland team taruba asaya Mizoram den Gujarat nung January 12 nungi 15 tashi asayatsü.

# Tajon Buchanan Inter Milan nung denogo

**Aenjeti/January 6, 2024 (Agencies):** Brugge nungi Inter Milan-i aotsü asoshi tenangzüktepba yangluba sülen Tajon Buchanan ya Canada nunger rongnungi Serie A nung asayaba mezüngbuba asayar akümtsü renema lir.

"Canada nunger rongnungi Italian league nung asayar mezüngbuba akümba atema ni kanga pelar. Iba ya takok tulu ka lir," ta Buchanan-i ashi.

Arishi küm 24 tain Buchanan ya euro million 7 agi alizükogo, saka bonus denerbo pa taa euro million 10 akümtsü akok, ta Gazzetta dello Sport sangdong ka ajanga metetdaksü.

2027-28 season tashi asayatsü atema tenangzüktepba yangluba sülen Buchanan-i season shia euro million 1.5 aatsü.

Buchanan-i tang tashi nung Canada tenüng nungi 35 ben asayar lir aser pa 2022 World Cup nung group asaya asemprongla tetenzük nungi asaya liasü.

Juan Cuadrado yiruba den Denzel Dumfries den tenangzüktepba meyanglushi lir anungji Buchanan-i coach Simone Inzaghi nem right wing nung teyari agütsütsü. Pa right back nung aser winger ama midfield nung asayaogo.

"Ni position aika nung asayatetba asayar ka lir. Ni position aika nung asayateter, saka kü nükjidongji takokba tashi angazüka team nungi asayatetsüsa jenjang yanglutsü aser asayar yimya tasen benoka asayatsü asoshi lir," ta Buchanan-i ashi.

Buchanan, taoba World Cup nung Canada team nungi asayaogo aser pa ya linük nungi Alphonso Davies aser Jonathan David amala lanur asayar tajung aika adokba rongnung ka lir.


"Ni indang indanga asayaba asayar ka lir aser ni defender tem den one-on-one asayaner



Tajon Buchanan

aser opposition penalty area temeket nung asayaner. Ni defence nunga tajungba küma asayatetsü," ta Buchanan-i ashi.

Inter pur tang Serie A nung Juventus dang nungi point ana agi timba sür temaba jenjang nung lir.



Brazil nunger nungtugu football asayar Mario Zagallo, shibai asayar ka ama World Cup pezü kokogo, pa arishi küm 92buba nung süogo. Zagallo shiba winger ka liasü, pa ya Brazil team-i 1958 aser 1962 küm ta World Cup atonga akokba team nung densema liasü.

# WTC rankings: Australia-i India ajateta temaba jenjangi tuogo

**New Delhi, Aenjeti/January 6 (Agencies):** Sydney Cricket Ground (SCG) Test nung Pakistan wicket ti agi akokba sülen Australian cricket team-i India ajateta ICC World Test Championship 2023-25 nung temaba jenjangi tuogo.

Pat Cummins lenisüba nung ICC title ana (World Test Championship Final aser ICC Men's Cricket World Cup) tashi bena 2023 küm kanga takok ngua asayaba sülen 2024 küma Australia-i maneni amokbanger asayadar.

Küm tasen nung SCG nung asayaba Test nung Australia-i wicket ti agi Pakistan koka asayamung 3-0 agi kokogo aser tang World Test Championship nung temaba jenjang tongtetogo.

India aser South Africa na tang asaya aliba Test asayamung nung asaya kaka akokba sülen Australia team ya ICC Men's Test Team Rankings nunga temaba jenjangi tuogo.

Australia-i 56.25 percentage points anguba sülen parnoki India ajatetogo, shirnoki 54.16

percentage points ngua lir. Kasa mapang nung Pakistan team tang trokbuba nung lir. SCG Test masaya tsüngda parnok indang percentage points 45.83 liasü saka tang 36.66 kümogo.

Mezüng bat asütsü shimba sülen Pakistan team-i run 313 yanglu. Parnok rongnungi Mohammad Rizwan (88), Agha Salman (53), aser No.9 Aamer Jamal (82) nungeri half century yanglua liasü. Iba sülen Parnoki Australia team nem run 299 dang yangludaktür ajak out sütsü. Run 14 agi tejakdang sür tanabuba innings tenzükba sülen asaya akoktsü asoshi Pakistan atema maongka tulu liasü.

Ajisüaka tanabuba innings nung Pakistan team-i junga masayatet aser parnoki run 115 dang yanglu. Australia team nungi Josh Hazlewood-i wicket 4 agia kanga junga asaya aser spinner Nathan Lyon-ia wicket 3 agia liasü.

Anogo pezübuba nung Australia team-i Pakistan-i yanglur aliba run ya over 25.5 nung menepa liasü.

# 2024 T20 World Cup atema fixture adokogo

**Aenjeti/January 6, 2024 (Agencies):** 2024 T20 World Cup nung India team group stage nung Pakistan, Ireland, Canada aser co-hosts USA den asayatsü, ta International Cricket Council (ICC)-i Hokolbarnü metetdaksüogo.

June ita mezüngbuba asaya USA aser Canada na asayatsü aser final asaya June 29 nü Barbados nung asayatsü. Ajaki kanga dang yonga ataba India aser Pakistan na asaya June 9 nü New York nung asayatsü.

India team-i 2007 küm mezüngbuba T20 World cup asayaba mapang final nung Pakistan koka liasü aser Pakistan team-ia 2009 küm iba asayamung kokogo.

Taoba asayamung ana koker aliba team England aser Australia na Group B nung Scotland, Namibia aser Oman den ata lir. West Indies nung asayaba mapang England-i iba asayamung kokogo aser 2022 küma parnoki final nung Pakistan koka liasü.

Co-host West Indies pur iba asayamung nung New Zealand aser Afghanistan den Group C nung ata lir aser Group D nung Sri Lanka aser South Africa nunger lir.

Iba asayamung ya USA nung tesem asem nung aser West

**ICC T20 WORLD CUP 2024**

International Cricket Council

- WEST INDIES (HOSTS)
- USA (HOSTS)
- INDIA (TOP 8)
- ENGLAND (TOP 8)
- NEW ZEALAND (TOP 8)
- PAKISTAN (TOP 8)
- AUSTRALIA (TOP 8)
- SOUTH AFRICA (TOP 8)
- SRI LANKA (TOP 8)
- NETHERLANDS (TOP 8)
- BANGLADESH (RANKINGS)
- AFGHANISTAN (RANKINGS)

Indies nung tesem trok nung asayatsü. USA nung tang mezüngbuba ICC World Cup ka asayatsü lir.

Group A: USA, India, Pakistan, Ireland, Canada

Group B: England, Australia, Namibia, Scotland, Oman

Group C: New Zealand, West Indies, Afghanistan, Uganda, Papua New Guinea

Group D: South Africa, Sri Lanka, Bangladesh, Nepal, Netherlands.

## BILEMDANGANG

"Takok asa inyakdang ochi nungi tepila."